

Duez Bidt Hal Duez Gais

Lix duez bidt neec ndeeul bail riangz jongs duez gais neec xunz. Hohdeec bail dooz noonl genl.

Jongs duez gais neec ral ndaix genl laail. Hohdeec miz banl duez laez haec bidt neec maz.

Bidt neec ral ngonz daz laabt, ral miz ndaix duez laez, deel xic daic daaus mal raanz ndooil.

Baus Bah Laih Wenz Aul Mbahyaangz Genl

Jic bil goons, lix baus bah ndeeul qyuh jaangl ronl seec. Lix baangc meeh raanz ndeeul dez hauxxiz guas ronl seec.

Baus bah reenl hohdeec dez mbahyaangz, xic laih hohdeec aul mbahyaangz genl. Baangc meeh raanz deec ndillaaul, haaix seedt gaais gal mbeel leeux.

Genl Duez Bih

Lix bux legsaail ndeeul, bux hees mal dangz raanz deel.
Raanz deel miz lix nooh, deel xic bail baangx dah degt bih.

Baangx dah lix bih laail, deel xic degt ndaix ndeenl xongl
jeeuc mooz. Mal dangz raanz xic xaauc haec bux hees genl,
bux hees xic aangh leeux.

Gal Duez Bidt Nyauc

Lix raanz ndeeul xiangx bidt laail. Lix duez bidt ndeeul ganx bail bas fiz guehxamz. Jongs nyeezneec laih deel, deel xic dogt bail ndael fiz, haaix ooh gal deel nyauc leeux, ndingh byaaic ndingh sonxmons. Bail riangzlangl baangc bail baangx dah miz ndaix, dangz jaangl ronl xic daaus dauc raanz. Sucraanz deel xic jangl deel xus ndael rongs, aul haux aul ramx geal deel.

Rumz Boos Laaux

Lix daaus ndeeul, banz rumz laaux. Rumz xic haaix gaais raanz beangc leeux. Nyas qyuh jaangl mbaanx, jaangl ronl duc mbinl leeux. Rumz haaix boos wenz goongl, boz wenz ndeeul miz gaamc ooh dul.

Guaslangl xic dauc wenl laaux, rumz yac ndingh boos laaux geh, haaix xus gaais raanz nguax yac xuaz, raanz haz yac doms. Daaus deec rumz xic xeeh ndaix laaux bais.

Duez Lingz Gueh Raag Hauxdais

Lix duez lingz ndeeul, bail rih gueh raag hauxdais feax. Xez deec miz lix wenz qyuh. Deel xic eux aul hauxdais. Ieh xic lix bux wenz yius reenl xic seedt dauc laih deel, deel xic seedt haaix gal dac leeux. Dangz waagt hauxdais ndeeul duc miz ndaix.

Baus Bah Gaab Legneec

Meanh xaux, baus bah ganx gaab legneec. Lix ngonz ndeeul, lix jic xooix legneec qyuh baangx dah guehxamz, baus bah dauc dangz xic gaab ndaix xooix legneec ndeeul bail.

Jongs xooix ndooil xic seedt dauc raanz gaaus haec bux laaux. Boz bux laaux deec xic seedt bail riangzlangl baus bah, xic daaus ndaix xooix legneec deec daaus.

Duez Lingz Qyaabk Jobt

Lix baangc lingz ndeeul qyuh heenz ronl. Lix bux wenz ndeeul gueh gax jobt, xic dez raabt jobt guas jiez deec. Jongs duez lingz xic beas deel ndaix jobt bail leeux. Deel xic aul lauc haec baangc lingz deec genl, baangc lingz deec genl lauc ieh, xic fiz nguacais leeux. Deel xic daaus ndaix jobt daaus leeux.

Waagt Waaiz

Lix bux wenz ndeeul xingl waaiz bail naz waagt. Waaiz miz gacnyiel deel, xic xingh seedt. Deel yac seedt riangzlangl. Waagt leeux riml haadt ngaaliz. Waaiz naais bais, bux deec yac naais bais.

Deel hal waaiz ninz ndael naz. Lix wenz laail qyuh heenz yius reenl jaailnauz deg soongl duez waaiz ninz ndael naz. Leeuxboz xic hauc reeul rianh leeux.

Bux Dal Ruez Genl Nooh

Lix xooix legsaail ndeeul, deel banz dal ruez, mizguanc deel haslix roox faz neeh. Lix ngonz ndeeul deel bail riangz raanz ndeeul bianh jigt.

Dangz xez genl haux deec, hohdeec xic nyaab nooh biz xus deel. Guaslangl deel xic riangz hohdeec nauz: “Hohsul xingh nyaab nooh biz xus gul, gul genl nooh biz xeengx leeux bais.” Leeuxboz xic reeul deel rianh leeux.

Rais Naz

Lix bux ndeeul jigt laail, deel miz ndaix gueh hoongl daaus laez guas. Lix ngonz ndeeul booh deel xaus deel bail rais naz.

Deel xingl waaiz bail dangz ndael naz. Deel xic raangc eeh binc, laih waaiz, waaiz miz byaaic.

Deel xic aul faix xingh faadk duez waaiz, waaiz xic daaus jauc dauc daab dinl deel. Deel xic hooznyaz, xingl waaiz daaus bail raanz ndooil.

Nuangx Laih Langl Seeh

Lix xooix ndeeul, xez deel haslix neec deec, seeh deel bail jiez laez, deel yac bail riangzlangl. Lix daaus ndeeul jaangl xiangl, lix bux hees legsaail dangz mbaanx.

Jaangl haamh seeh deel hal boz buxduz bail nyiex bux hees, miz haec deel bail riangz. Mizguanc deel xic gueh raag bail, miz haec seeh deel rooxheeh. Leeuxboz xic reeul deel xingh riangzlangl seeh deel.

Soongl Duez Yuangz Neec

Lix ngonz ndeeul, duez yuangz haaul neec ndinghhal duez yuangz foonx neec lac haamc dah. Deeuz dah deec deg ndaix ndaagt faix laaux ndeeul dauc gueh jeeuz raaih.

Duez ndeeul guas baaih unx dauc, duez ndeeul guas baaih nix bail. Hohdeec byaaic bail dangz jaangl jeeuz, miz lix duez laez uaail duez laez.

Duez yuangz haaul neec ndinghhal duez yuangz foonx neec dungx haaix, duc lumz ndaanglgaus ndunl genz ndaagt faix dooh. Ieh xic soongl duez yuangz neec duc dogt bail ndael dah bais.

Nyiex Bux Hees

Meanh xaux, bail gueh hees xic ganx dungx nyiex. Lix baangc legmbegt ndeeul bail mbaanx ndeeul gueh hees.

Dangz jaangl haamh, xez hohdeec genl hauxxauz deec, xic lix baangc legsaail xooz ndeeul dauc nyiex hohdeec.

Raanz deec lix dangs saaml gal gueh xingh, boz legsaail deec xic xaauh dangs boz legmbegt deec ooh, haaix jic bux legmbegt aanxjaangc jaangl xoongz haux, haaix gaais haux gomc leeux. Leeux raanz wenz xic bumhhaauc reeul rianh leeux.

Duez Mal Neec Xingc Hees

Lix ngonz ndeeul duez mal neec xingc duez meeuz neec, duez ducrec neec, hal duez mooil neec dauc genl haux.

Deel ndaix mbahyaangz haec leeuxboz guehxamz, ieh xic bail gueh hauxnangc haec leeuxboz genl. Ieh daaus ndaix legjooic, masdaauz hal binxgoh dauc haec leeuxboz genl. Hohdeec genl ieh, xic riangz duez mal nauz: “Doolsiel, mengz deg buxduz ndil ndeeul.”

Duez Waauc Guehxamz Haux

Lix raanz ndeeul lix jic saangh haux. Jongs duez waauc maaic bail guehxamz haux raanz deec. Yah raanz deec yius reenl xic binl bail ndael saangh laih.

Jongs duez waauc bail gooc dinl beah, gal was hal eeul beah yah deec. Yah deec ndillaaul xic ngas rianh leeux, leeuxboz xic bail qyox yah deec.

Jongs duez waauc yac dauc gooc dinl beah leeuxboz, hohdeec xic daangs bux daangs seedt deeuz gaais gal mbeel leeux.

Duez Faanz Saml Seeuc

Lix ngonz ndeeul, duez faanz neec riangz diec deel nauz:

“Diec, mengz guehmaz ndillaaul duez mal mus? Mengz laaux saangl geh mal, yac seedt nyamz geh mal, mengz seedt qyaamh ndeeul daangs deel jic qyaamh, mengz wooil yaangmaz xic haslix laaul deel mus?”

Diec deel reeul nauz: “Leg, mengz nauz ndaix hoz. Gul ndangh geh duez mal, mizguanc gul miz rooxheeh wooil yaangmaz, gul sooh rooxnyiel hingl duez mal, gul xic seedt deeuz miz aul mingh. Gaais nix xic deg saml seeuc, mizguanc saml seeuc guas yac miz banz, miz unl daangl ndaix feax, dangz ndaanglgaus duc daangl miz ndaix.”

Dingz Ndaml Naz Dingz Diaulhuh

Meanh xaux lix maix baex moos ndeeul, deel bail riangz feax ndaml naz. Lix jongs nyeezneec bail hanz naz eemh deel laail, yincwooil meanh xaux bux neec maaic eemh baex moos.

Maix deec yac miz rooxheeh qyahfaz, xic gueh haec wenz laail mbasreeul. Deel xic xangcih dingz ndaml naz dingz diaulhuh, haaix gaais daaix xuaaic leeux. Baangc wenz ndunl hanz naz eemh deel deec, dangz bux laaux bux neec duc reeul deel gaais bas ax leeux.

Bux Hooc Dooh Sel

Meanh xaux lix xooix neec ndeeul, raanz deel hooc laail. Jaangl haamh deel qyox sel yac miz lix dangl. Mizguanc deel ndiabk ndaix yaangz ndeeul dauc roongh qyox sel. Deel xic bail gaab aul jongs duez roonghrib dauc jangl xus ndael bingz laaux, ieh xic weenl xus heenz xoongz deel, xic yungh gaais ndoongh roonghrib deec dauc qyox sel. Raanz deel hooc dangcnix duc haslix homx dooh sel, gaais suans nix haslix reez dangz xez nix.

Duez Gais Eemh Duez Haans Yuz Ramx

Duez gais bux, duez gais meeh ndinghal jic duez gais neec dauc eemh duez haans neec yuz ramx. Gais neec yac lac bail ndael ramx, mac deel xic ngas, “Miz banz, miz banz, hohsul miz roox yuz xic daail ges.” Duez haans laaux reeul, nauz: “Dauc gul el hohsul bail yuz ramx.” Duez haans laaux xic el gais neec yuz bail yuz mal, haclumc ndeenl ruez neec ndeeul nic. Jongs duez gais neec xic aangh leeux.

Gueh Longl Miz Lingx Longl

Lix xooix ndeeul bail xozxaaul, deel qyuh genz xoongz laauhsec guehxamz. Deel miz qyox ndilriz, haaix bingz ramx maag gomc bail genz xoongz. Genz xoongz lix benz sel ndeeul, ramx maag lail bail hauc sel leeux. Qyuh xez deec miz lix bux laez reenl. Dangz xez laauhsec dauc deec, laauhsec xic hams deg bux laez haaix ramx maag gomc. Mizguanc xooix deec yac miz nauz. Deel laaul laauhsec nauz deel, deel xic miz lingx deg deel haaix gomc.

Duez Al Genl Ramx

Lix duez al ndeeul hooz hes, ral ramx genl. Deel yius reenl ndeenl bingz ndeeul, ndael bingz deec lix ramx. Mizguanc, ndael bingz lix ramx neec, bas bingz yac xeenz. Duez al genl ramx miz ndaix, gueh dangclaez gueh mus?

Duez al yius reenl heenz ndaangl deel lix rinl neec laail, deel xic aul baiz ndaagt baiz ndaagt rinl neec xuangs xus ndael bingz. Ramx ndael bingz xic neeh neeh henc dauc genz, duez al xic ndaix genl ramx bais.

Bail Gueh Hees

Lix baiz ndeeul, lix baangc legsaail ndeeul bail gueh hees.
Bail dangz mbaanx deec, lix raanz ndeeul raiz hohdeec bail
genl haux, raanz deec xaux gueh jic gaais nooh biz qyuh
ndael xaus fuzdazlonx hal biagt gaadt ndooil, miz lix biagt
maz deeml.

Ngonz deec hohdeec daaus dauc raanz, dangz jaangl ronl xic
lenh nauz: “Mac heh! Raanz deec miz lix gaais maz banz
genl, gah lix jic gaais nooh biz qyuh ndael xaus ndooil,
xeehleeux seeusmazduaanc bais!” Hohdeec idt daaus bail jiez
laez gueh hees duc xingh nih dangz raanz seeusmazduaanc
deec, leeuxboz xic reeul gaais nac jeedt leeux.

Gaab Miz Ndaix Duez Bih

Qyuh nyas ndianl ndaadk deec, jongs nyeezneec maaic bail baangx dah guehxamz, bail dangz baangx dah hohdeec xic doodt wasbeah, seedtbooil seedtgal jaanh ramx guehxamz.

Ieh lix jongs duez bih dauc duh wasbeah hohdeec, hohdeec xic bail gaab bih. Gaab hac ndaix hac ndaix, duez bih xic mbinl deeuz, gaab beens dangz ngonz laabt duc miz ndaix duez bih laez, haaix qyuh baangx dah das ndidt gaais ndaangl foodk leeux ndooil.

Ramx Dumh Guaagt

Lix xooix neec ndeeul ndaix xib ngih bil, qyuh raanz riangz gungc deel daez raanz. Gungc deel xic lenh meanh xaux haec deel gacnyiel. Gungc deel nauz: “Meanh xaux lix ramx dumh guaagt leeux lacmbenl ieh. Haaix idt yaangz leeux lacmbenl daail leeux. Lix soongl bixnuangx xic ndoonx bail ndael mbux ndiex, beens dangz xez ramx xeez leeux deec. Soongl bixnuangx deec xic ooh dauc rooh. Hohdeec xic xaax gueh bux wenz moos.”

Waagt Xiez

Meanh xaux lix raanz ndeeul xiangx duez xoox xiez ndeeul.
Dangz xez rais naz deec, raanz deec aul bail dieh naz.
Mizguanc duez xiez deec qyah laail, ganx damc wenz. Lix jic
bux wenz gaml duez xiez, aul eeh xus eeul deel, duez xiez
deec yac miz haec xus.

Duez xiez deec qyuh ndael naz xingh seedt baaih bail baaih.
Guaslangl duez xiez deec dez dangz ruaaus seedt baangx dah
bail genz, haaix gaais ruaaus waaih leeux.

Rumz Laaux

Lix haamh ndeeul banz rumz laaux, yac qyaabt byac laaux.
Lix meeh ndeeul, deel hal leg deel bail raanz feax xunz.

Xez daaus dauc raanz deec, hohdeec ooh dauc dangz baaih rooh, rumz boos laaux laauhhoh, xic boos gaais raanz haz beangc leeux. Rumz haaix boos hohdeec goongl basdul raanz deec, hohdeec xic sooh goodt ndaix seenc saul baaih rooh dul raanz deec.

Guaslangl rumz seeuc neeh, hohdeec xaaux dauc raanz hohdeec ndaix. Haamh deec jazmizraangz lac ngaix rumz guaadt bail bais.

Soongl Duez Mod Raaih Ndaangl Duez Waaiz

Lix duez mod ndeul raaih bail dangz genz dinl duez waaiz, nauz: “Waaiz hal dooix laaux dungx saauh.” Daaus lix duez mod ndeul raaih bail dangz gaul waaiz, nauz: “Miz hoz, waaiz gooz dangenix, raiz dinc hal legdiangl hac dungxlumc.”

Waaiz rooxnyiel, xic reeul, nauz: “Hohsul dol byaaic dol neeh, ieh xaaux dungx nauz.” Soongl duez xic qyuh genz ndaangl duez waaiz raaih bail raaih mal, raaih miz leeux genz ndaangl duez waaiz naaus. Hohdeec xic nauz: “Waaiz laaux jiezraaix, laaul hohrauz raaih leeux bil duc raaih miz leeux ndaangl deel.”

Wenz Saml Headt

Meanh xaux qyuh mbaanx bux Qyooix, boohmehh bail rih
leeux, xic xeel leg gah daez raanz. Raanz bux Qyooix rooiz
laail, qyuh baaih rooh deems dal fal duc yius reenl ndael
raanz.

Xez gul haslix neec deec, lix ngonz ndeeul rumz laaux
laauhhoh. Rumz boos bail dangz ndael roog naic gul, haaix
riabt mbinl bail mal bail mal.

Gul yius reenl xic ndillaaul seens leeux, jaailnauz ndael
deenh naic gul lix wenz waaih. Gul xic xeel dul miz haabt,
seedt deeuz xeel gal miz aul.

Duez Waauc Neec Ral Buxduz

Lix duez waauc neec ndeeul, deel gah guehxamz mbeah laail, deel xic bail ral buxduz riangz guehxamz. Deel yius reenl duez rog laic mbinl genzmbenl, yac yius reenl duez bidt neec ndinghhal duez haans neec yuz ndael ramx. Mizguanc hohdeec duc miz roox binl faix, yac miz rooxheeh riangz deel guehxamz.

Duez waauc neec daaus xingh ral, ral dangz xez roonghndianl ooh dauc, deel xaaux yius reenl duez reenz neec ndeeul qyuh genz gool faix guehxamz. Deel xic nauz: “Deel xaaux deg buxduz gul aul ral deec, deel roox binl bail genz binl bail lac.” Hohdeec xic dungx guehxamz ndilmaiz leeux.

Bux Jigt Bians Banz Bux Ganx

Lix bux ndeeul jigt laail, miz gueh hoongl maz ndilriz. Xez feax bail gueh hoongl deec, deel xic qyuh raanz ninz, raanz deel xic miz lix haux genl.

Lix daaus ndeeul deel xic bail gueh raag, ieh feax gaab ndaix xic dez deel bail jangl. Jangl ndaix saaml bil xic xuangs deel daaus dauc raanz.

Baiz nix deel dangz raanz deel xic ganx bais, ngonz ngonz bail gueh hoongl. Meanh nix raanz deel xic lix haux genl, xeenz yac lix yungh, miz hooc bais.